

東萊先生詩集



東萊先生詩集卷第三

呂本中居仁

廣陵

借韻
文潛體
戲用

往來六十里各是一江郊柳色團渦岸春風楊子橋
好山當斷岸野鳥度空巢一任雷塘路暮天風雨號
沈宗師甚喜江梅而微貶醪醖因成一絕
淡綠衣裳玉作粧好風涼月自相當沈郎笑汝多情
在不似江梅滿意香

勸張李二君酒

張侯好詩如好色不敢為主而為客李侯好酒如好
詩心雖甚壯無人知兩侯風味俱不惡如芙蓉與木
芍藥午窻留客看筆快曉枕無人猶睡着廣袖漸變

天寶糲大字不作元和脚世人譏笑乃其分政是仍
叔之子弱病夫坐穩無所求荒簷斷雨鳴春鳩爐煙
未盡消百憂恨不緩帶從公游何時清江橫小舟與
公一醉荻花秋却來密庵參牧牛

庵居

鳥語花香變夕陰稍閑復恐病相尋正應獨有江山
分素自都無廊廟心堂上老親雙白髮門前稚子舊
青衿兒曹不會庵居意古澗寒泉疑至今

小園即事

千花老無蹤衆草來可喜欣然得幽尋我亦病良已
飛飛兩蝴蝶不悟塵土裏禽聲甚可人亦似相汝爾

人生貴愜志不必須甚美三年白沙詩已費千幅紙
問君何所樂赤手費摩洗短屏看遠山心作千萬里
此豈盡者功實自一念起君當如是觀在此不在彼

登舟

夜雨曉猶滴怒風晴更吹已無行役念寧有別離悲
舟楫三年路江山一月期東庵舊還往不廢百篇詩

張禕秀才乞詩

白蓮庵中張居士夢斷世間風馬牛風塵表物自無
意神仙中人聊與遊

張舊與前輩名士往還甚衆

澄江似赴北城

曉苦雨不放南山秋君當先行我繼往向吳亭東留
小舟

效古樂府三首

君住長江邊妾上長江去長江日夜流相思不相顧

住一作家

長江日夜流妾心終不改誰謂江頭人相思不相待
東家石榴紅西家石榴紫俱是一種花同生不同死

讀太真外傳

上盡馬嵬路東風吹舊京乾坤已新主草木自秋聲
錦韉千年恨皇輿萬里程寧知挽船士亦有別離情

簡甯子儀二絕

只恐老去被花惱更欲忘憂須酒澆何似山堂病居
士閉門高枕過春朝

新晴欲上南樓月柳可藏鷗水蘸牆無限客愁芳草
裏不知風雨阻斜陽

書寄浹上人

胷中無一毫事筆下有千斛力走遍江南江北山滿
堂禪和不相識

呈愚上人

不能歸續侍中貂遂有聲名伴老饒萬里更行看驪
裏一枝才足賦鷓鴣詩囊硯礪君其漫藥裏侵尋我
亦聊舉目雲天盡新語躬勤收寄一牛腰

贈浹上人一上人

君行南山南我在北山北不聞浴鵠白但見染絲黑

老境欲垂垂快意須得得孰知百雉堅而有一日克
浹如澗底松縱老終不踣一如雲間鶴不復可羈勒
我如千里風遇此兩鴻鵠明珠脫氛翳曉日破昏塞
宿障不盡除曾次猶筆墨君看說詩口乃是拔山力
冰霜卧偃蹇歲月飽封殖誰能窺藩籬未易得闡闕
政當歛光芒不必須緣飾相從無何鄉敗衲依破械
更令好事人妙語添一則

政當歛光芒不必須緣飾一作政當磨其鋒共掃煩憊賊

雨後月夜懷沈宗師承務

雨雲攬江色偃蹇破昏睡千花閉紅紫妙見一室內
披衣行夜永明月在船背微風過蕭瑟古柳立蒼翠
脩然一蒲團堅坐覓詩對我生無南北所到意輒遂

孰知十年游保此清淨退頗念城北人結友老杉檜
漫隨長鋏歸甘作短檠棄出門萬里涂已駕安得稅
何當持被來把酒相就醉

開一
作開

秋夜示李十

晴鳩不時鳴雨鳩不暫歇相去跬步間婁見履齒折
寒泥擁衰草秋扇罷殘熱今晨好風景稍貸屋頭月
清光冷相照玉艷滿金玦喚客坐前窻文字相澡雪
殷勤傍詩律未暇了翹蘖瀾翻談經口邂逅如意鐵
我歌君輒書字字有行列不須陞極嚴但要兵衛設
譬如南山石琢齒當井滌真成一戰霸未可三鼓竭
人生各涇渭世事亦滕薛高堂食肉人兩馬方躡齧

何知緼袍底猶有不安節

中秋日沈宗師約遊城西泥雨不果因成四

十字兼寄趙才仲

遂阻城西步兼懷雪上遊長風掠歸燕苦雨應鳴鳩
月向誰邊好寒催社後秋傳杯有新韻能憶老兄不

桃花菊

嫩粉殷勤換淺黃鬱金叢裏見新粧已翻百疊紅衣
潤更沐九回沉水湯

九日晨起

漸歇歐蚊手真成把酒天長河印曉月老木聚荒煙
了了江山夢區區文字緣南堦兩三菊極意作今年

王氏郊居

江山處處好落日極登臨
雨續蔬畦潤風吹柿葉陰
客船頻上下水鳥故浮沉
尚有南飛鴈丁寧可寄音

對菊

稚子尋花莫漫狂已知衰疾負重陽
新霜有意留青蘂更放殘枝十月黃

雨後至江上有懷諸子

落日滿寒雨長江收夕霏
定知聊復爾敢望不相違
野鳥晴相喚殘螢晚自飛
殷勤兩山口好爲放朝暉

登南樓

疾風吹沙不成雨十日狂陰倒殘暑
江頭樹木半焦

枯不厭潮頭洗塵土南樓反照千丈紅落日却在洪
濤中舟人漁子莫惆悵更借朝來東北風

歲晚作

南山雪雲千尺高北山晚田無寸毛富兒巨家飽欲
死笑我陋巷長蓬蒿道人坐穩忘作勞百念解縱如
垂橐但當折簡喚我曹並坐擇蝨煩抑搔筆力可借
秋江濤莫學人間膏火熬

弔古塚

荆榛閉莽蒼千歲一孤墳生則無是叟死應冥漠君
略無他日念唯有不堪聞想得西陵道荒臺亦暮雲

奉送子之還京師

日月老投閑文字今削跡便然腰十圍欲吐啄三尺
頗懷平生友相就語肝膈諸江好兄弟夫子眉最白
詞林三二公子實門下客布帆千里來許我間賓席
階庭出蘭樹戶牖照圭璧詩如駕高浪萬頃隨筆力
寧爲首陽餓不作嬖奚獲乃知工語言要是飽糠覈
茫然李杜壇未免陳蔡厄出門觀善陣斂手避勍敵
澄江搖夜霜歲晚見沙石釵頭罥蛛絲即有梁宋役
士生多艱虞道遠自古昔相期逍遙游不計天地窄
名聲了三黜談笑供百謫別君爲此言可當繞朝策
外弟趙才仲數以書來論詩因作此荅之

君才如長刀大窾當一割正須礪其鋒却立望容髮

平生江海念不救文字渴茫然攬轡來六驥仰朝秣
病夫百無用念子故踈闊未能即山林頗復便裘褐
前時少年累如燭今見跋胷中塵埃去漸喜詩語活
孰知一杯水已見千里豁初如彈丸轉忽若秋兔脫
旁觀不知妙可愛不可奪君看擲白盧乃是中前筭
不聞鐵甲利反畏疆弩末興薪遵大路過眼有未察
君能探虎穴不但須可捋

才仲佳士也年十七八時
隨其父演在定州子開及

晁四諸人比
其文柳子厚

過子之泊船舊亭

江郎泊船處草徑不勝秋客裏終年別春前萬斛愁
山橫采菱口月滿望江樓政可夢春草莫令吟白頭

望金陵偶成兩絕

臺城南望入斜陽
尚想能詩玉樹郎
乘興風流莫相
笑眼看直北是雷塘

雷塘別有風流坐
可作南舟兩日行
江水自流春自
好不知芳草爲誰生

烹茶

水光欲盡瑠璃影
玉色初浮翡翠斑
便覺麴生風味
惡小爐新火對蒲團

西樓

小院無人日自長
隔簾時有芰荷香
客游未作安居
計更借西樓一夜涼

寄信上人

笑語三年別舟航十里淮新霜變草木好雨過風霾
萬事不如意一生常好乖何因伴明月特地入君懷
秦處度與一上人同宿密庵處度爲一畫斷

崖枯木

小庵無客亦無氈遂有高人借榻眠一夜西風撼枯
柳不知春在石崖邊

寄謝無逸并汪叔野兄弟

老謝風流綠綺琴小汪兄弟亦南金文章已悞半生
事江海略酬他日心好酒不當愁偏仄舊書差尉病
侵尋平生恩義泮宮老斷縷寒泉百尺深

汪信民没方數月

月下

白鷗笑汝不能飲澄江惱人勤作詩可惜南樓好風

月只無春柳對瓊枝

汝一作我

劉穆之

金杵一斛貯擯擲戲調兒童走欲狂不謂林間有元亮念公時在酒中藏

戲贈道浹上人

忽逢邗溝道人浹如見錫山居士素問着世緣渾忘却知公不是箇中人

喜章仲孚朝奉見過十韻

苦語不難好舊交今則無但能留客坐已勝折腰趨

只有連根煮初非滿眼酷苔痕記柱杖雪影傍跣趺
語道我恨晚說詩公不迂丁寧入漢魏委曲上唐虞
歷歷有全體忽忽或半途真當置度外不敢望庭隅
日月換新歲江山非故吾他年佳句在與畫密庵圖

山谷論作詩法當自碑臯陶賡歌及五子之歌
以下皆當精考故于論詩必斷自唐虞以下

觀甯子儀所蓄維摩寒山拾得唐畫歌

君不見寒山子垢面蓬頭何所似戲拈拄杖喚拾公
似是同游國清寺又不見維摩老結習已空無可道
牀頭誰是散花人墮地紛紛不須掃嗚呼妙處雖在
不得言尚有丹青傳百年請公着眼落筆前令我琢
句逃幽禪異時淨社看白蓮莫忘只今香火緣

寄朱時發

茨橋脊梁硬如鐵天下柱杖打不折倒騎佛殿出三
門南頭學來北頭說昔苗未生今作米更判阿師三
尺蒲公但吸盡西江水莫怕庭前簸箕尾

簸箕尾事出
小釋迦錄

寄穎昌諸叔

身如許縣老龔丞心是江湖版下僧萬事聊憑曲肱
夢一尊時近短檠燈舊遊可數終難又惡况雖多不
厭曾尚憶少年情話否夜窓相對髮鬢鬢

心是一
作心似

謝人送瓊花白沙人謂瓊花爲無雙花戲成

兩絕

疑塵欲滿讀書窓忽有瓊花對小缸更喜風流好名

字百金一朶號無雙

斷腸風味久難尋尚有名花寄此心折盡長枝已春晚只宜涼月不宜陰

觀甯子儀朝奉山堂諸石三絕

箇中真味久難忘但覺人間萬事忙今日爲公留不得剩分詩思入山堂

向人懷抱終何有過眼崢嶸得暫醒更喚秦髯與滌袂爲公題作小南屏

知公心似山堂石悞落人間几案間今日風光已相負看朱成碧未能還

十一月五日與才仲弟相別于白沙東門之

外悵然久之不能自釋乃知謝安石作惡之
語不爲過也因成八詩奉寄可見別後氣味
亦可并示京洛間親舊也

終年想顏色未有食頃忘君寧不我念苦畏冰雪妨
斯文百戰罷閱士如堵牆孰知五湖口一葦可以航
君才不長貧太阿之在匣故知讒慝口不受龍象踏
此道有從來骯髒端不乏相期甕頭春夜語重一呷
盛欲與子談乃復爲此別忽忽得餘歡把酒到耳熱
人生不如意肝膽有楚越何知若人胸中有積立鐵
伯姑無恙時令我與子友周旋以至今各是遺種叟
文字種聲名於身亦何有還書問兩弟是事君識否

婦如先姑賢見似乃翁好識君相與心見我亦傾倒
頻年作離情悟賞到丘嫂卜鄰洛水陽此語當在早
低頭拜東野未厭撻挾窮停軍問縮酒不計牛馬風
曾次脫塵滓欲與秋水同斯人未遽遠當在阿堵中
往者汪信民愛我不自勝以我如古人得與子並稱
若士不復有斯言當伏膺期君極膏沃更作無盡燈
鍛以百鍊剛淬以萬里流閉門待疆敵忽見天地秋
以石投水中萬歲終不浮堂堂倚松老於今忘百憂

東萊先生詩集卷第三

東萊先生詩集卷第四

呂本中居仁

山水圖歌

君不見南江老龍夜不眠令我破屋開青天千巖倒
壁卷角上一榻却在洪濤前又不見江頭古木一尺
圍猿猱接手懸高枝雨中寒蘆披靡去天際風帆先
後歸陳生故是可憐人筆雖未到心已親南村北村
渴欲死怪此一室無纖塵鄭虔祁嶽不解竒韓幹畫
馬空多肥萬里咫尺君得之更看湘江雷雨垂

陳生
欲盡

湖湘
圖

庚寅年正旦郡中客次作

曉霜挾霧入寒廳四坐伊優不暫停剩欲禪房作新

歲念無餘瀝到空瓶詠諧與世聊從俗嘯傲它年可
乞靈更爲旁人住俄頃坐間愁殺兩螟螣

題李伯時維摩畫像圖

老松攬天四無壁小菴不勞容一室野竹入戶芭蕉
肥下有無言病摩詰文殊妙對亦未真身如浮雲那
得親驚倒同行問話人彼上人者何所云龍眠好事
筆有神不避世間狐兔群掃渠曾中千斛塵多口阿

師聞不聞

掃渠一作洗盡

遣懷三首

何山不堪隱何家不可居古來子華門亦着荷畚夫
荒田脫積雨未免供晚租今日視昨日但見有不如

故人勸加食老親憐嗜書寧知毛錐子不可一日無

一作一日不可無

秋風襲殘暑忽過江上林且日扶杖來不見十畝陰
蔬畦甚寂寞亦受霜雪侵念此不常好如我宿昔心
濤頭落崩岸野鳥助謳吟潛魚着沙底避網冬更沉

襲一作鑿

異時忘言人馬驥今宿草生平不如意欲伴寒木槁
遂令藜莧腸更盡組繡巧三年對空案誦子詩可飽
從來文字工不解顏色好相逢期後身再訪西院老

謂信民也

符離阻雨

天對雨高稻知禾蠶相親或無絲

東風吹船窻未曉天復雨篙師促添纜卧聽泥濘濘
不知城北園春事今幾許舊游如宿昔花柳默可數
鄰里先後來頗復相勞苦東家獻牛酒西家饋雞黍
感渠長女情愧我無所取汪侯哦詩處積水敗環堵
念此不忍行不但出入阻七年此端居畏病如畏虎
故人饒與黎此老可共語

伍貞祠

伍貞廟前一丈碑上有野鶴雙來棲水雲杳杳涼去
遠風雨冥冥秋到遲江花相趁野花發舊燕不隨新
燕歸大夫遺恨竟何許楚越勾吳今是非

東園

垢汗久思出江山秋更新荒田出龜兆老檜落龍鱗
風月猶堪夜蒲蓮浪作春籃興亦乘興實自厭冠巾
往時濟陽晁公子今日靈巖琦上人千山不礙一月
曉北樹忽見南枝春箇中有味渠不識底處無情公
得親不知碧眼之面壁何如黠顏西入秦

即事戲答季一

斜陽着高柳環堵半黃昏小圃三年旱荒池一尺渾
粗知詩有味寧使婦無禪不信晁公子猶招楚些鬼

季一詩云思與諸公論
人物試憑清議賦招鬼

湘竹

小兩催寒入夕曛湘江風味可憐人班班玉淚無時
盡裊裊金梢別是春

有懷宿州城北因作詩寄才仲

宿州古城城北隅雨罷晴開如畫圖雜花亂葉未須
道白杏一枝天下無香風裊裊入短袖明月蕭蕭隨
蹇驢二年不復見此樂清江萬頃正愁予

示沈宗師

十日兒號不出房殘梅猶在小瓶香沈郎喚客煮湯
餅政恐匆匆未得嘗

九日狂陰一日晴落花飛絮作清明與君携手南樓
去共聽長江月下聲

夜坐戲成兩絕呈迪吉宗師二友

夜窻燈火著新寒喜見蒲團一味閑縱有好詩人不
要却須還與檻前山
踈簾欲上梧楸影遠枕微聞盆盎鳴甚欲分身就公
宿只愁塵土變江聲

戲成兩絕奉簡章仲孚兼呈宗師

日日勃鳩相應鳴年年春草趁愁生道人不怕冰霜
面又作南舟十日行
沈郎愛客如愛酒章子問詩如問禪肯共寒爐撥殘
火共搜佳句作新年

老松

奉君以綠綺琴報我以雙南金
盃中琥珀不須盡聽妾一聲
行路吟君看庭前老松樹上
有杳默不斷之清陰牆低未
礙髯髮古歲晚不辭霜雪侵
東園桃李自妍好與君百生
同此心

揚州雍熙寺納涼

高樓有餘涼但見旗脚動鳥語
簷角來仰聽風響弄江山舊
還往草木老賓從平生一笑適
可得萬鈞重脩然六尺床更許
佳月共

訪張鑑秀才兄弟

眼看霍霍萬錢食便就匆匆五鼎烹
何似張侯五兄弟閉門相對飽芹羹

邵伯埭路中

行前蒲柳後鷗鳥乃似白沙之舊居忽見雲天有新
語不知風雨對殘書往來河樹幾傾蓋上下江船如
貫魚更與河山結香火夜窻重枉故人車

寄周司理

日月走動勦舟楫卧煩暑涼秋在萬里客子安得語
周侯磊落人憐我自熬煮躬勤半月留可得一笑許
別來今幾日坐此百里阻清風不時來曉月仍半吐
卷簾看脩竹忽似對眉宇人生行樂耳舍此皆自苦
終期卜隣歸重聽對床雨雖無嗚嗚歌亦有坎坎鼓

山光寺前泊舟值雨

輕雷喚小雨憶在白沙時綠酒留連醉紅燈取次詩
好風那復有涼月自相隨獨上山光寺清歌無柳枝
步月有懷

平生最愛花梢月可與青樓一等看病去老來渾忘
却曉窻晴日上蒲團

揚州留一上人

日日東風吹客衣小園春在掩芳菲殘花過雨飄零
盡好鳥穿林自在飛往事虛成采薇瘦故人頻有食
言肥知公未厭西行晚且伴江船緩緩歸

送一上人之京師

東風吹雲十日雨卧聽城頭打衙鼓道人遠自山中

來共坐南窓濯泥土自然高韻到羲皇豈止微言變
齊魯萬牛回首不震掉一葉橫江且掀舞未能入水
取蛟蜃尚欲投戈伐貔虎念公守此非一朝木病魄
魂無枝條已盡千峯西嶺雪更夢八月錢塘潮京城
塵沙深一尺是中莫留公履迹權門蹲啞兒女笑我
一思之不能食片帆無事早歸來爲公一洗山中石

擬古

狡兔死三窟老松堅百尋物生各有願共此分寸陰
荒城六月旱長江三日霖稻苗不遂死幸無蟲賊侵
皇天不私覆一語銷百壬先王典刑在落落傳至今
願以小人腹而爲君子心

寒雞不能晨苦雨自朝夕上爲雲雷巢下乃龍蜃宅
坐懷陰外天缺月掛殘魄少來可喜人牖戶陳玉帛
平生千萬言略省二三策牛山所種木日在斤斧厄
念君十年心使我雙鬢白

潘邠老嘗得詩云滿城風雨近重陽文章之
妙至此極矣後託謝無逸綴成無逸詩云病
思王子同傾酒愁憶潘郎共賦詩蓋爲此語
也王子立之也作此詩未數年而立之邠老
墓木已拱無逸窮困江南未有定止感歎之
餘輒成二絕

漫營新句補殘章寄與烏衣王樹郎他日無人識佳

景滿城風雨近重陽

好詩政似佳風月會賞能知已不九萬里潘王舊鄉
縣半江斜日落歸帆

寄李商老

竹不可一日無酒不可飲不醉平生嗜酒愛風竹此
意不許九兒會南來經年飽塵垢袖手甘隨百夫後
文章漫作無功身只了兒曹補窻竇黃沙障日江漫
流青山喚我十年舊憶昔泊船鵝翎口把酒遙爲故
人壽只今身在心已老千巖想像靈芝秀君家兄弟
固不九解挽三友勤相就中郎卧病過春晚昔則酒
狂今詩瘦山房大名不墜地諸老風流未宜棄老檜

參天可乞盟，菜食劔羹乃無味。如君高韻千載同，可更託身三數公。丈夫勁挺要長久，百萬叩關一夫守。曾中江海不須道，此流何必計升斗。眼前勃宰詎二友，聽客所爲公絕口。

雨中作

咄咄真成夢，悠悠復未知。寧爲牛背語，不作劔頭炊。雨挾秋聲亂，江含暝色悲。故知無事飲，猶勝頃來詩。

示內

貧賤不可忘，富貴安足羨。我生未三十，種種厭貧賤。宦情肱九折，老味金百鍊。稍回功名心，來結香火願。平生所知人，久已焚筆硯。是中無真實，不在儒術緣。

有如退飛鷁更借逆風便病妻頗癡絕可與共開宴
小女真吾兒語學春鳥轉初非本來有且作夢中見
居看手捉鼻絕勝扇障面他年從吾名同入隱士傳

寄外弟趙柟材仲

長年更多疾念爾不能忘夢去關山靜書來道里長
形骸且憔悴草木自蒼唐古縣踈還往微官絕歎揚
頗聞能吏事仍不廢文章客舍襄江下人家筑水傍
婁成千里目虛斷九回腸我老知無用身閑欲半藏
預愁章服裹仍怯簿書忙事業煩詩卷生涯在藥囊
得非嵇叔懶寧似次公狂野檜多鱗甲寒松半雪霜
高天一鴈遠小徑百年荒每惜朱絲斷空懷素錦張

舊交渾潦倒此語更微茫欲判五斗米先尋百本桑

殘羹得共啜薄酒要同嘗匣裏出鳴劍眼中除眯糠

未容窺突奧虛自倚門墻指點飛鴻路何人識故鄉

一本自野檜多鱗甲寒松半雪霜下云直須守歲晚

莫美踏春陽夙受祖師印得遊夫子墻直言無異理

未學故多方必若除煩惑先能起什僵君才可辨此

吾說未應亡匣裏得明鏡眼中除米糠高天一鴈遠

小運百年荒每惜朱絃斷懷素錦張馬難逢伯樂

麟有遇鉏商却倚摩天刃兼除治水航舊交渾潦倒

此語更微茫欲判五斗米先尋百本桑永無南浦送

頻受北風涼想弟眉宇好見兄籌策良殘羹可共啜

京師贈大有叔

尊酒相逢十載前綠髮紅顏俱少年尊酒相逢十載

後皮黃肉皺俱白首叔如鴻鵠但高飛姪似麕麝更

三薄子同看億千場指點征鴻路無人識故鄉

二

送

深走南來行李初一逢長安舊第冰雪中閉門不識
故人面豪氣直欲輕元龍平生爲道不爲食少小所
期皆目擊何時相就過江南同訪曾遊舊泉石

寄蔡伯世趙才仲

我恨不識鹿門公蔡郎心期千載同不隨吏部曹中
板去赴長蘆寺裏鍾

一坐十月長江濱自君之來心轉親還書起居清源
君人間紛紛何足云

同行者誰平原孫於我不但骨肉親誰言不爲桃花
去只愛江山亦可人

二子逃禪不計年江湖重去水粘天直饒透盡三關

語到底終成百漏船

木魚光裏兩蒲團意氣與我平生歡盡底告君君不

會空得癡人尋筆端

兩蒲團謂愚壁時
諸人爭收壁書

寄范子

范郎平生萬人傑只今未免兒號寒三江五湖在曾
次琨玉秋霜看筆端舊疾祇令肝肺熱春風欲開桃
李顏待約南江今夜月與渠萬里報平安

春風

春風隨長江一日行萬里蕭條起岷山歛忽度揚子
江南千酒樓春風樓上頭金樽開翠幄青帘吹客愁
長堤二月暖寒溪千古流紛紛桃李花處處作芳華

不見梁間燕空悲王謝家

聽琴

君不見龍門之下百尺桐
漂霰飛雪愁寒空
何年班爾落君手
小窻伴坐歌南風
恍然如著山巖裏
不知身在塵埃中
初聞平野飛鴻鵠
歛聽金盤起珠玉
遶壇古樹鬱嵯峨
六月吹霜作寒綠
折楊黃花不須道
別鶴離鸞尚堪續
君不見開元天子醉
西都音聲十院留
歡娛當時臨軒奏
此曲徑須解穢煩
花奴乃知恬淡世
莫識無絃之趣
何時無歸家愁
厭箏笛耳此聲一聽
還已矣會須流水訪
鍾期試向爐中覓
焦尾

雨後

新花欲盡竹當欄喜見空墻野色團稚子乘陰蔭蔭蘭
菊僕夫留水灌萋萋茶香於汝初無分酒孰逢人也
強歡惱亂春光君會否小瓶猶占一枝殘

送山伯良佐東歸以務道期息塗爲韻

荆棘生良心米鹽入塵務芬芳老不達豈不以此故
人生錐處囊穎末要立露玉壺近青蠅沒沒自黥汚
刳心萬物表却立看脫兔

臨別當一言猥猥念忠告縹囊可取足往結萬古好
默識古則然愚智同一道遠師顏氏子近比伯業操
文章有妙斲期子開突奧

吾詩如清風去留不可期灑然或一來不繫九子知

兩郎從我遊豈但窺藩籬山房光焰在實藉衆木枝
斯言可三復如我清風詩

昔我同學生文字虎而翼仲弟最多才去以六月息

自吾失若人每語輒氣塞子如求數君名莫怪蝨賊

曾懷但明了几案付塵黑

贈我貂檐榆報以明月珠古來聲名人一一行此塗
漢中屠沽兒適可曹公奴人生嗜好異至有海上夫
孰能識其然飽此萬卷書

河水清贈良佐兼寄商老

河水清江水黃南山北山自相望恨君不止白石房
與誰同遊南郡郎白玉刻佩明月璫如鳳四海求其

鳳道里遼遠日月長爽氣自足陵朝陽舉酒送君君
莫忘

同晁季一李天紀過沈宗師北莊因成長韻
三年城南居不識城北土但聞玉雪郎去作猿鶴主
今晨籃輿來握手相勞苦勝遊有佳士洗耳聽妙語
晴窻背雲壑落日在環堵晚風生白楊想像原野古
斷崖懸老木小港聚寒雨却觀城市人努力自熬煮
畏途出枉席禍福有未覩杜陵懷壯遊無忌笑豪舉
二者覓真是政恐君未許千秋柴桑翁妙句聊一吐

郵上祈雨

泥龍蜴蜥困追求旱遍淮南二十州寄語天公莫輕

許少留明月作中秋

清風

清風如君子所至有餘情
忻然破煩溽百醉時一醒
嗟我二三友飄散秋葉零
不知城南王何以識我名
歆斜左手字勞苦如平生
會寫登樓賦一弔漳濱靈

學視

學視覩懸虱病耳聞鬪蟻紛
然酬六鑿萬劫費措洗
君看林中蛇妄想從何起
忽聞一妙語初無強料理
回觀積年疾乃是一念使
誰能明此心香山老居士

寄舍弟

殘暑墜空屋舊書穿破帷
才蒙小雨潤遽得好風吹

逸少每作惡淵明常病羸他鄉憶吾弟苦語自成詩

斷雲

斷雲西南來好風東北去翩然兩無心空中忽相遇
化為一尺雪照我亭前路昔者甚可憐今來渺無處
故人多難色留我不少住羈愁動中腸疾病增百慮
虛庭着明月皎皎如積素不見乘鸞子空懷舊煙霧

如臯道中

客路三月雨頗知袍袴單長河貫沃野薄酒動離集
秋風蒸藿盤衰顏定可笑必無事者

東萊先生詩集卷第四

東萊先生詩集卷第四

文心已

東萊先生詩集卷第五

呂本中居仁

初去白沙再望路中江南諸山慨然有懷

青如美人濃淡各有態挽之不肯來乃似孤竹隘

卷無千里風限此一衣帶夏木與藩屏不畏炎日曬

三年白沙游藉爾寬眼界脫身塵垢中一笑終不壞

別君更舉酒未了清淨債雖無絲竹娛會有詩律快

何如少陵翁亦為杜鵑拜吾詩有餘歡此語君勿怪

赴濟陰留別一公

近別君莫嗟遠別君莫惜往來天壤間誰為不相識

十年幾相別日月虛棄擲見君長江口已作胡眼碧

別君廣陵城妙語摧霹靂今別知幾時復念駒過隙

坐成千里阻當有片言益不勸君愛身不勸君強食
勸君以勇決萬事要努力愚夫之所欣智士之所戚
譬如醉而顛亦有傍震虢聲色糾纏人萬劫困封植
本自驕墮生亦以因循得實惟招侮慢豈止礙空寂
居然耳目內反務化勅敵誰能深山中弄此無孔笛
芳草變蕭艾每爲長太息如公定不然此語當謾憶
何妨膏腴地更論去荆棘君看一壺用亦有千金直
五月五日泊舟北神與關聖功唐充之李元
輔作別意殊惘然端午日行次洪澤把酒北
望已如異世事矣因念屈大夫之死正是此
日慨然有感於心輒成長韻奉寄李民師翁

士特來可求和也

麥上蝴蝶飛水邊鷓鴣卧却望山陽城已若一夢過
今晨又端午把酒意亦墮風回浪蹙船聞淺沙著拖
故人阻情話客子且清坐更念屈大夫是日遇奇禍
空餘後世名弟子只增些寶璐與明月皎皎不受流
固知汨羅沉可到首陽餓還書二三老此語君可和

贈唐克之兼簡益中

三年白沙看江山可當中原故人面今來千里逢故
人笑談却作江山見江山故人不相遠平生志願於
君滿唐侯獨立一代無張侯與之來集枯老松本自
歲寒外良馬不畏長途驅飢年百室仰粟廩暑路六

月懸冰壺念昔關汪不相貸視世好爵如機械上書
索去不作難云我未了平生債後生少年延頸觀諸
公故人思一快基本未定天奪之賴有君侯數人在
龍媒已遠風馭回坐歎四海梁木摧爾來老謝又繼
往但覺眼界常塵埃長江無津出光怪迥野入夜開
風雷此語不誣君可驗請君更討防身劍

夜雨

夢短添惆悵更深轉寂寥如何今夜雨只是滴芭蕉
出門見明月

出門見明月入門思故人故人如此月一見一回新
明月相見多故人相見少問爾何因緣長似此月好

故人在何處南北東西路明月在咫尺夜夜庭前樹
明月莫虧缺故人莫離別願月如故人故人亦如月

夜夜庭前樹一作宿我庭前樹

往歲在白沙見江上往來祠神者殺猪羊鵝鴨

日夕相屬也有感於心後至濟陰因成長韻

當託白沙故人投之廟前庶幾神少知自戒乎

今日殺一羊明日殺一猪問神何所樂而必爲此歟

羊死噤無聲猪死足號呼傷哉鴨與鵝閉目頸已朱

問神此何負神亦何所取吾知斯民愚非是神所許

江船一帆風江田一犁雨民或謝神勞尚使相告語

但采澗溪毛足以薦筐筥何須汚刀几而後羞鼎俎

於物固無怨於神亦無苦更令嗚嗚歌時送坎坎鼓

濟陰野次

去年騎馬古城西
雨浣鞍韉一尺泥
今日重來轉無緒
強扶衰疾遶河堤

毛彥謨容膝軒

黃金爲樓玉爲梯
畫旗素錦生光輝
不如一庵醉而歸
倒卧側立無東西
君才於用無不宜
會稽竹箭梁山犀
賈而不售君不疑
亦自不以爲珍竒
淵明妙處君得之
萬古一首歸來辭
一庵容膝君所知
不用芥子藏須彌
望風懷想三歸依
眼前有睫見者誰
世人紛紛不自治
何異羊質蒙臯比
見豺而戰忘其皮
牆

頭燕雀莫謾肥汝不仰看鴻鵠飛伯夷去採西山薇

想渠瘦亦不勝衣不羨汝曹腰十圍一本倒卧側立無東西下云小

憲容膝君所知不用芥子藏須彌君才於用無不宜醫無間之珣玗琪會稽竹箭梁山犀賈而不售君不

疑亦自不以為珍竒淵明妙處君得之萬古一首歸來辭望風懷想三歸依眼前有睫見者誰我生甚窮

今則衰何異羊質蒙阜比見豺而戰忘其皮恨不與子歸同時君生於書無不窺文字皆好尤長詩令我

琢句相追隨牆頭燕雀其漫肥汝不仰看鴻鵠飛伯夷去採西山薇想渠瘦亦不勝衣不羨汝曹腰十圍

濟陰寄故人

柳絮飛時與君別南樓把酒看新月月似當年離別

時柳絮隨君何處飛千書百書要相就思君不見令

人瘦念君情意只如新顧我形骸已非舊朝來有信

渡黃河鴈足繫書多網羅城南城北芳草多明月如

此奈愁何

晁叔用得古鏡二一以遺法一上人澄澈可
愛底水隱然犀樓突起又作杯渡禪師像翻
翩然衣動正在中流間也一求記於予因爲
作歌

晁郎高居卧冰雪得此懸空兩秋月已將屋角倒魑
魅更與人間洗炎熱一月團團如扇面一月菱花光
掣電憐君囊中一物無意欲分君託方便菱花入袖
世莫識空堂夜留踈雨滴天生寶氣有期會復恐藏
去終無益君行萬里尋劒術山精喚君君莫出寒泉
百尺傍枯樹狡兔九月投霜鵲未須潘謂苦哦詩或

自蘇公識神物下有禪和不笑人須君一照蛟龍窟

別離行

城頭草木日夜黃九月北風天兩霜月色入戶侵我
床美人乃在天一方舊游可樂不可忘恨君不隨鴈
南翔恨妾塊守此空房曉風忽來吹夢長夢中與君
還故鄉黃金爲屋玉爲堂與君更笑億千場不須合
佩雙鴛鴦

李念七久不見過二絕

不隨殘暑退青蠅入眼囂塵漸可憎靜裏工夫君莫
厭夜窻重對短檠燈

羅襦襟解燭滅後喝雉喝盧人散時願君莫忘默軒

老少小先蒙國士知

往年與關止叔相別用上止叔見勉學道甚勤且曰無爲專事文字間也及今五年矣尚未有所就因作詩見志且以自警也

老關別我時笑我勤苦甚曰吾與子然同此一味靜收功粥魚底筆墨有譏評五年念此語但見日月競雖無蛾眉斧亦有宴安鳩斯人今何往想作大樹蔭我走足欲壘始學兩鳥噤君看齊聲謳何異衆哭臨繁紅成春條本自其天性風雨頌繫一作摧折之不有十日盛人生亦何聊共未免此病乃知鑿頭通已勝狗

脚朕

洞山會下有僧法空具宿命時有通上座者刻苦練行空以水照之知其前身爲魏孝靖帝也

時衆中謂通
爲纒頭通云

六月初三日雨後步至城東

涼秋生郊原快雨灑庚伏曲肱訪幽睡朝夢不可續
開門招此山爽氣滿崑各村蹊沒衰草古院蟠翠木
東行得幽亭小徑來已熟下有十里濠暑退萬荷綠
恨無沽酒錢一醉起枵腹人生要快意豈止寄幽獨
若看後池蛙聲韻故不俗怡然供清歡何必絲與竹

得揚州書

書來每恨日月晚書去還憂道里長但得老親常健
好不辭新歲且窮忙文章已受塵埃沈禪觀多為疾
病妨趁得殘春北歸否近筭臨穎是吾鄉

道里一作道路

歸計未成作詩寄懷

萬里田園半有無十年歸夢阻江湖文章繆忝聲名
在氣體猶須藥餌扶客路因風起舟楫水田無雨卧
菰蒲青帘白酒斜陽外不與行人滿眼酷

閱舊詩卷有懷

好詩無過亦無功準擬還家贈阿宗會有江山與前
袂且無塵土共從容大江矯矯雲間鶴老謝森森澗
底松回首百年俱一夢暮年文采更誰從且無一作略無

高郵道中荷花極目平生所未見

綠淨紅深水不流炎天烈日自然秋只供野父已無
計便與行人亦暗投明月不來江北岸好山應在石

城頭何年得映潘妃步更放君王作意游

高郵遇大熱作

南風極炎暑赤日不可傍扁舟在地底淺水安得強
坐懷長河冰未盡喝飲狀甚憎食案蠅意欲不相讓
旱苗乾欲死蒲藕秋可望平生投筆手中有無盡藏
尔來但深藏穩着犢鼻上有如三年艾更復加百壯
黑雲翻日脚好雨終不放雷聲無事來粍粍車百兩
東街暴泥龍西街設銅像利害有不同未易相得喪
農夫責催租日夕困大杖那知清歌前把酒有餘量

題孫廣伯主簿家壁

古木輪囷老歲寒好花無力便凋殘秋風只在盆池

上但作江湖萬里看

贈孫廣伯

人皆笑君拙我獨喜君直拙則世所無直則未易識
昔者中丞公事主以一德從容進退間多士所取則
朝廷九鼎重冠冕萬夫特塵埃困大路此老難再得
至今門下士必以身許國孰知強弩末而有百鈞力
賢孫後來秀見我好顏色收功却掃中欲任門內責
空卷入善陣匹馬見勅敵不嫌不識察但恨無此獲
欲赤莫如丹欲黑莫如墨吾常持此言以辨主與賊
苟無牛羊害則有天地塞君能但拙直亦莫忘黑白
與吳迪吉諸人赴晁季一陳塘范園之游因

成十韻

春風未寂寞頻枉故人車客舍輕寒下村煙宿雨餘

曉紅留隱映新綠上扶疎妙墨懸高榜殘章得舊書

即所謂白水滿時雙鷺下蛟龍忽舒卷草木自清虛渺渺登臨地

悠悠水竹居只今那復有本自不關渠塘水空遺廟

塘即陳元龍所聞今園面有寺名龍涼有元龍廟在此塘上龍涼亦故墟唐武宗時所建寺

邊有龍為水害同行喜佳士所到即吾廬政恐習池飲風流

却未如

送晁季一罷官西歸

少年閱人若郵傳漢廷公卿日千變故人一蹙便青

雲咫尺相逢不相見丈夫鬚髯但如戟黃塵沒馬渠

未識是侯文采老不聞兩耳壁塞目為昏三年刺促
簿書裏更覺和氣生春溫誰能種蘭生九畹從公不
辭墮車蹇冰霜入眼蚊蚋去桃李成蹊草茅遠胷中
滄海無水旱眼底浮雲看舒卷頃來江上幾送迎聚
蚊成雷公不驚笙竽沸地不知曉公但寒窻延短檠
乃知風雨晝窈冥我亦不廢晨鷄鳴箕山之下潁水
邊脫冠便歸須壯年請公先尋買山錢我亦從今當
着鞭

侯羸

游士縱橫翻覆手山東諸侯望關走歷下邯鄲無使
來長城易水非燕有大梁賓客舊如雲夷門監者未

有聞謾將苦語送公子市井屠酤虛見存後來毫髮
爭得喪紛紛小兒跨跌宕不知世有公子牟一生放
迹江海上

昭君

凍雲霾空風折木烏孫公主歌黃鵠昭君請自嫁單
于當時各倚顏如玉霧鬢雲鬟胡地塵帳中誰是可
憐人左抱琵琶右揮手胡地漢宮能幾春嗚呼古來
出婦嫁鄉曲何曾肯望秦雲哭

戲呈外弟趙才仲

趙郎風味春月柳可到阮公青眼邊秋水黏天劇空
闊曉霜挾月作嬋娟比來好句傳新鴈一夜客愁如

少年安得瓊枝更當眼沙頭同理釣魚船

城北別江子之

但覺與君別孰知歸興長亂畦分宿雨老木掛晨

一作

新

霜未許綠詩瘦只知如許忙它年風雨夜重約細

商量

訪晁季一

近人鳥雀兄弟語堆案簿書鳥鶩行是中亦自有佳
趣公但徐之渠自忙西風忽來涼月曉楓葉蘆花秋
意少勸君多飲莫多談截斷中流公更參

吳君求詩因作四韻寄之并簡小吳與甯生
文字縛人同東濕吳君不言如坐忘知公曾中有餘

地萬頃亦在一葦航寒梢倒掛夜來雨細草已披秋
後霜寄語兩吳兼小甯莫因詩律廢相望

古劍歌

寒江九月雷殷空落日倒射千山紅江頭樹木半傾
倒袞袞不盡洪濤風風中有物如長戟電光忽來傾
霹靂雨罷晴開不復知乃是潛蛟倚長石蒼皮半卷
頗飛動澁蘚中開欲跳擲青熒野火下絕水天矯長
煙轉空壁天生神物有時出歲月飄流爲誰得銅花
欲盡秋水渾尚有千年妖血痕向來天地亦兒戲俄
頃變怪徒紛紜君不見豐城之來亦不父寶氣何爲

上牛斗

初夏即事

歌呼連牆亦任渠移門賓從又何如

是日西鄰置晴酒會客甚盛

堦仰日卧紅藥野水趁船跳白魚多病且參隨
桶話得閑時近養生書平生不盡幽居興付與長江
拯釣車

偶作

鄙夫養病苦不足諸公覓官常有餘自是閑人不更
事可隨雲鳥更深居

癸巳自南京過泗上

昔我往矣天欲霜今我來思梅已黃淮山凜雪塵垢
面魚稻騷除藜藿腸好風肯伴客帆遠故國不辭歸

夢長塔中老人莫相笑我自寂然渠自忙

泗上贈楊吉老二首

杯中蛇去無恙醉裏詩成有神相逢不及世故長年
倍覺情親

置王坦之膝上着陳長文車中何似維摩丈室蕭然
一榻清風

題寶應張氏草堂

好風殘暑不同途穩看飢蚊自掃除不謂南軒有佳
竹捲簾相對一牀書

學仙行

長松拂雲根合抱雪虐霜凌不相到下有千歲老伏

萃化爲琥珀光自照食之便可登廣寒不但無病長
年少浮生溷濁那可言和氣乃爲塵務煎坐看靈藥
置泥土五味雜置成薰羶豈不聞齊天子黃金丹成
不肯仙且貪人間樂不能從汝飛上天惜哉韋郎之
妙語一失毫釐千萬年

冬日訪朱深明博士二首

北風迎馬入裘茸來訪殘爐半日紅
敗屋數間書百篋無人知是老龜蒙

見公便是倚松老念我不忘擔板心
萬里江山一尊酒主人無古亦無今

東萊先生詩集卷第五

東萊先生詩集卷第六

呂本中居仁

初別清源姑才仲弟過楚丘作

前村後村鳩亂鳴
梨花點雪柳半青
斷雲忽過楚丘
縣驟雨已見龍丘亭
故人愁緒各南北
宿酒別時同
醉醒語離情緒乃如此
故園可歸公不聽

宿楚丘懷石子植顏平仲趙才仲

暮行楚丘北
適與寒雨值
旅舍一尺泥
又乏芻秣費
故人渺天涯
客子初夜至
披衣附殘火
煮茗當晚饋
昏昏傍晚枕
悄悄入清睡
向來談笑聲
已若異世事
但覺舌本間
尚有宿酒味
鴻鵠乘秋風
意在網羅外
強飯無多談
此語敢失墜

發召伯埭二首

柳外鷓鴣相應鳴，屋頭新月半輪生。
知公未便爲官去，且放扁舟自在行。

曉日烘窓不得眠，夾河高柳亂鳴蟬。
西風種種入愁思，更有長亭十里船。

余病不能蔬食，懼有五味口爽之責，作詩自戒。
君不如屈大夫夕餐，但秋菊不如顏平原米盡，且
食粥。雖知舌本欠滋味，頗覺和氣實。其腹癡人要盈
餘椒，有八百斛錢，有一百屋鼎俎，碗腥膻杯盤眩紅
綠。四方採珍異，亦未極。所欲寧知下箸處，但有一飽
足坐償。性命債百死，有未贖。何如野僧飯晚菜下脫。

粟撞鐘擊鼓坐高堂童奴唱飯來相續竹間新筍大
如椽樹頭老耳肥於肉亦不見蟹躁擾亦不見牛殼
餽石郎愛惜非萍蘘晉侯睥睨熊蹯熟以此相重輕
於君未爲福

南山

南山佳有餘我病不自得今日飲君家把酒到曛黑
秋風浩萬頃涼月掛江色對此不能歡何以消偏塞
人生少如意百語輸一默喜逢佳主人略爲解羈勒
歡然有餘味即此是溫克陽春內空洞隱如一敵國
世賢首陽餓我愛鄭朝穆却懷三年艾未盡一醉力
青蠅閔殘暑小雨頻敗北漸須把蟹螯莫計舟摧抑

君看兒女笑終勝官事逼殘盃蓋餘瀝御勿貸鷄肋
要看知我真不獨觀酒德

與諸弟諸李同登塔山愚壁以事不能來因

成二絕

李家漾南江漫流幕阜山前春更愁無人肯會西來
意且作小詩盟白鷗
道人_不來花滿山蹇驢出沒松聲間待約江頭今夜
月與渠他日報平安

春日二首

春日紛紛一段奇無言桃李任春欺要須及熟蘆灣
去莫看風吹雨打時

誰將舊日狂蜂蝶誤入春風桃李蹊咫尺風光不相
貸無因乞與上天梯

東園

暫開還落不停枝雨濕東園柳絮飛遙想釣船今夜
月暗隨潮信與春歸

即事

經旬無客事亦少多病閉門身更輕我自不能知許
事暮江斜雨送蛙聲

和李二十七食蛙聽蛙二首

膏香未即輸鮭菜煎和真同食蛤蜊北人驚嘆不下
箸乞與韓公南食詩

莫驚朋類多驚爆曾伴中郎鼓吹來今日屬官本渠
分晚江煙雨開池臺

題秦惇秀才園亭

秦郎重

太
上
御
名

水邊亭髣髴踈林過雨聲更喚清泉入

屏坐少留他日濯吾纓

別夜

薄酒殘燈欲別情暗螢依草不能明懸知先入他年
話一夜蛙聲連雨聲

寄題蘇州靈巖

水分西子採香徑山是吳王避暑宮可惜同來不同
賞落花飛絮曉濛濛

呈甘露印老

水滿南河月滿牀市樓燈火隔秋江無人可會庵前
事一夜北風吹破窻

壁上人欲行爲雨止戲成一絕用前韻

東風不借南舟便細雨輕寒鎖暮江更想亂山明日
路暮天風雨打船窻

江口送壁上人二絕

小雨浮江霜送秋曉山晴遠讀書樓道人不作當時

面萬里一帆隨白鷗

予夏中數讀書江樓上

今日鉢囊南去人當時雕句作新春更知自昔相逢
意定是他生骨肉親

送朱時發

眼底家鄉不自歸，癡人爭認劫前灰。
直饒古廟香爐去，也要披毛戴角來。

送甯子儀

洪波奔放不停塵，萬劫茫茫寄此身。
畢竟無人會休去，滿堂枯木不能春。

唐張瑄書記梁時婦人黃鼎因侯景亂沒北

齊爲小校胡兒所虜生二子後附海舶歸聞

鼓角得岸乃知是會稽郡鼎先在梁許嫁張

固及歸固適爲剡令求與相見不可乃遣令

送之宣城鼎在齊時作秋風曲渡海時又作

詩三章瑄書稱其詞淒怨自瑄時已不傳

萬里秋風曲三章渡海詩絕勝漢公主略似蔡文姬
故國山河在荒城鼓角悲何如覓張固不用憶胡兒
夜坐呈吳迪吉

伏暑不能旱楚天頻復陰疾雷衝雨斷亂草接江深
舊圃可小摘老盆餘數斟明朝有傾倒相待沃愁吟
與李去言諸人分題得之字

人生行樂耳此去復何之酒憶徐公聖月如京兆眉
未須誇敏捷或恐勝肥癡不作別離見却憂兒輩知
訪秦氏北莊

午日城西路籃輿欵舊尋稻田踈野草徑接秋陰

飯憶分盤至書藏遺子金不須千里目枉費百年心
喜才仲兄弟至偶成四十字

落日下喬木好風來暮船徑思投轄飲復作對牀眠
寂寂驅愁外紛紛着酒邊平生五經笥不直一囊錢

春日

數畝幽畦滿小園兒童無事亦嘲喧水搖日影上簷
角風送花香來鼻根病去只留花作伴客來常欠酒
應門城南旱麥塵埃裏不借春江一尺渾

甲午送甯子儀歸洛

異時從公游頗恨相得晚同參長蘆禪共聽資福板
公今三年病我亦百事懶春風廣陵城笑語有未欸

嵩陽有歸路河水漸清暖豈無一言贈尉此千里遠
青松老合抱意不在俗眼豈如山上苗共盡白日短
一身隨藥囊萬事付茗盃爐煙裊晴窓自足了遲緩
奈何孔文舉苦要坐客滿更知蘇門公遠效嵇中散
舟行儻見念此語試三反

相得一作相見
有歸一作歸

讀舊詩有感

但聞微雨響梧桐不悟高樓盡日風團扇向人仍有
意短檠於汝漸無功悞游兀者形骸外恐墮淵源雲
霧中剩攬飢腸供好句爲君常占一生窮

別後寄舍弟三十韻

還家日已短況此獨行情客路三年別秋帆十日程

小船攜手上斜柳縱篙撐岸失乖龍鰲窻留素月縈
重回召伯埭虛住廣陵城破屋仍堅坐殘鶯只強鳴
江猶渺莽去草欲蔓延生水縮蛙墓聞場空霧雨橫
土風沾瘡癘民俗混蠻荆豈識排門入兼無倒屣迎
好詩思共讀薄酒念同傾枕席煩團扇膏油乏短檠
可無道里念或恐夢寃驚惟昔交朋聚相期文字盟
筆頭傳活法曾次即圓成孔劔猶宵鍊隨珠有夜明
英華仰前輩廓落到諸卿敢計千金重嘗叨一字榮
因觀劔器舞復悞擔夫爭物固藏妙理世誰能獨亨
乾坤在蒼莽日月付崢嶸凜凜曹劉上容容沈謝并
直須用欵欵未可笑平平有弟能知我它年肯過兄

初非強點灼略不費譏評短句筵篔引長歌偏側行
力探加潤澤極取更經營徑就波瀾闊勿求益益清
吾衰足歎墟汝大不敬傾莫以東南路而無伊洛聲

記夜

殘暑薰炙人客夢不得長忍蒙千里風尉此六尺牀
高梧舞清影上懸明月光初更枕簟穩未厭塵土忙
中宵有臭蟲其大如蝓蟻排闥觸屏帳怒欲凌空翔
熟視不得名但見兩翼張本草所不載爾雅所未詳
夏蟲盛百族此物尤猖狂東窻不得睡幸無疾病妨
惜哉有知物點污此微涼人生要更事美惡無不嘗
悉除糞壤念頓悟服食方去爲千丈松凜然衝雪霜

御名
勿學瓜瓠置身籬落傍

夜坐

廣陵城中聽夜雨倒牀不眠問更鼓西風萬里卷長
河遍與淮山洗塵土淮南米賤魚亦好敢復摧頽歎
羈旅重簾復幕懶相負細字寒燈且如許漫如爾雅
注蟲魚更就篇章考齊古粗知俛首受寒餓未暇着
意尋豪舉床頭有酒不敢飲況復闔門畫眉媿故人
此去今幾時亦有文字相撐拄東明縣前濟陽路每
一夢至猶能數少年不憚道里遠平生未省別離苦
只今多病鬚已白尚能呼渠醉而舞田園未還君可
恨歲月漸晚吾何取飢蟲遶壁不自聊爾獨何情促

機杼

寄唐充之二十韻

俗事日相促吾生常作難長河已萬折險路復千盤
坎壈深藏步岑嶽穩轉鞍誰知守搏散略不悞泥蟠
末學多乖謬微軀實控搏小兒成項領烈士吐心肝
許下少文舉吳中無伯鸞直須識根柢始是極波瀾
念此欲誰語想公還自寬屢成長劔倚得洗夜蟲酸
解后終年別劬勤一笑歡已除舌本強仍斲鼻端漫
直節群公念高名四海看相期更無事所祝在加餐
晚日留殘雪春雷續淺寒欲行殊未必堅坐只長歎
不厭道里遠敢辭裘褐單却尋三語掾重對兩蒲團

剩欲洗曾次先留倒筆端何須灞陵岸回首望長安

竹西亭

十年走塵土重上竹西亭草木新容態江山舊典刑
狂風掃毒暑落月伴疎星認取揚州路荒城一抹青
邵伯路中逢 御前網載未利花甚衆舟行
甚急不得細觀也又有小盆榴等皆精妙奇
靡之觀因成二絕

花似細薇香似蘭已宜炎暑又宜寒心知合伴靈和
柳不許行人子細看

玉檜盆榴作隊來異香相趁不相猜從今閉向深宮
裏莫學江湖自在開

飲秦少方家

秦郎家畔一甌茶何處清涼不是家
客子三杯玉泉酒主人一曲浪淘沙

孫量臣約遊乾明借秦少方韻見贈復次韻

答之

睦州香火趙州茶走遍叢林不着家
今日爲公拈出也兩橋人語是高沙

僧問睦州如何是自已州云看香火去僧問趙州州喚云與茶去

春晚郊居

柳外樓高綠半遮傷心春色在天涯
低迷簾幕家家雨淡蕩園林處處花
簷影已飛新社燕水痕初沒去年沙
地偏長者無車轍掃地從教草徑斜

外姊趙夫人智量一作諒以良人沒祝髮感歎

成詩

故人前去冢纍纍爲恨爲憂未肯歸縱有青山可藏
骨却無紅淚與沾衣饒三笑汝參禪誤是四憐渠祝
髮非猶勝同儕二三子枉隨秋草閉斜暉

代贈

十年流落漫西東想見謝家林下風晉邑自思藥孺
子魯儒空望叔孫通風花已分飄藩外玉樹何情著
土中縱有春梢堪寓目却無人面與爭紅

又代贈

略無歸夢遶湖湘漫逐微陰出建章月裏寒珠一生

露鏡中衰鬢十年霜逢人莫唱相思調閱世終無却

老方想得扁舟北還路斷雲衰草更斜陽閱世一作與世

臨川王坦夫故從谿堂先生謝無逸學北行

過廣陵見余意甚勤其行也作詩送之

王郎別我春已晚索我題詩敢辭懶讀書萬卷君所

聞只要躬行不相反聖人遺言凜可畏小事未免書

之簡衣冠瞻視有法則何獨文章要編刻譬如逆風

曳長艦竭力正在千夫挽君行念此須飽參即是谿

堂句中眼無逸嘗有送吳君詩云問我句中眼

登淮南樓

樓上西風日脚斜樓前廣道更人家高林稍稍變黃

葉細草重重冒白花薄酒尚堪澆舌本故人何事走

一作天涯蓬籠只繫南亭下乞與寒江整釣車

題淮上亭子

亭下長淮百尺深亭前雙樹老侵尋暮雲秋鴈且南
北斷壟荒園無古今露草欲隨霜草盡歸檣時度去
檣陰秋風未滿鱸魚興更有江湖萬里心

夏夜大雨呈若谷叔并晁叔用江子之一上人

中庭電光垂四壁雨脚溜初如單車馳忽若萬馬驟
並牆不相語燈影照圭竇翻思共按樂日月不得又
叔能糠覈肥姪且藜藿瘦買田嵩穎間欲往今已後
且夕呼晁江把酒且相就更煩一上人不語居坐右

贈一上人

細褥紗幮卧軟綾豈知秋色到襄陵
飢烏乍定門門樹寶塔新晴夜
夜燈晚菜聊充肉一嚮殘杯才當飯
三升平生積懶成僑憶慚愧空房獨坐僧

又雨路絕賓客稀少聞后土祠瓊花盛開亦
未果一往也

卧聞更鼓濕不鳴曉窓但有摧簷聲雲橫不放山入
坐風怒欲倒江衝城東家酒熟花爛漫折簡喚客留
娉婷街頭泥潦一尺許意雖欲往無由行儒生活計
亦不惡蒲團堅坐到日落映窓香穗觸凝塵過眼文
書開病膜明朝新晴有佳處穩看小檻翻紅藥無雙

亭下一枝春玉潔霜清未寥廓閉門懶出君莫笑看
汝多愁吾獨樂故人無事儻能來爲君試舉舒州杓

同狼山印老早飯建隆遂登平山堂

塵埃障西風草木被朝日籃輿郭北門未厭來往疾
僮奴懶不進頗復費呵叱道人先我行宴坐已一室
殷勤勸客住午飯當促膝爐煙窻紙明鳥語樹葉密
却上平山堂晚景更蕭瑟澄江渺天際妙句不容乞
平生泉石念固自有遺失何能從兒曹十事九不實
茲游豈不快此老固坦率尚從文殊師一往問摩詰

舟行次靈壁二首

往來湖海一扁舟汴水多情日自流已去淮山三百

里主人無念客無憂

小市荒橋貫濁河故人雖在懶誰何只因遠地經過
少更覺新年坐卧多

己亥上元數同晁季一叔用清坐不出

北風凜凜吹月高萬木夜作窮猿號卧聽車馬赴塵
土愛此一室明秋毫小爐著火晚收焰短檠照坐寒
無膏主人忘言客亦懶更煩赤脚送茗盃子雲事業
本清淨維摩方丈常蕭散出游苦畏今日閑歸坐略
盡平生欵自知衰病損剛腸只要文書遮病眼公能
却掃趁閑暇渠自低頭費牽挽明朝乘輿尚能來咫尺
吾廬不嫌遠

寄李商老

黃塵車馬流金火戰殘暑西風迎潮來密雲復無雨
江淮早已甚映眼但塵土田疇雜蕪穢草樹翳洲渚
緬懷平生歡捐棄各秦楚千言偏曾次到口不能吐
君非一臂舊此意復可許青蠅暗藩溷有似嚇腐鼠
須君濟川手略爲虹蜺舉念之不能眠清坐聽鳴櫓

晚至城南

來往城南路今年又作冬荒林掛落日古寺疊踈鐘
職事日三出交游時一逢可憐河上水唯少莫山重

東萊先生詩集卷第六

東萊先生詩集卷第七

呂本中居仁

汴上作

不使西風便解維且留殘暑震餘威累累野水循河
下攝攝榆蟲撲面飛五斗漫隨王績隱一裘聊待晏
嬰歸平生事業新詩在送與江南舊釣磯

初抵曹南四首

未辨歸山計

一作卧病初無策

今年學作官簿書妨好夢塵

土敗餘歡但有妻孥累初無肺腑寬從來畜鮭菜不
上八珍盤

久罷攝生術虛

空一作

藏種樹書病多詩輒廢秋到客

仍踈約帶何繇緩穿靴不暇徐猶勝策高足辛苦曳

長裾

併足經庭右褰裳入坐隅頻一作時容著帽進雅稱折

腰趨燥吻應一作難濕殘杯莫強濡平生駟跛鼈今

日更長途

往時汪博士勸我便歸休細雨簷花夜長江楓葉秋
欲行殊未必高卧恐無由感歎思亡友端居可泪流

可亦只

言志

馮驩客傳舍彈鋏歌不已託身孟嘗君惟有一劍耳
何事食無魚何事出無輿先生猶有劍至我劍亦無
一來曹南郡優游聊自娛春風吹我衣春草生庭除

小便胞絡轉晚髮手自梳仰面送歸鴈低頭羨游魚
幸有薄薄酒浸漬滿腹書安時待天命吾心亦何如
長缺莫漫彈何必憶吾廬

學道

學道如養氣氣實病自除驗之寒暑中可見實與虛
頽然覺志滿乃是氣有餘豈唯煖臍腹便足榮肌膚
但能嚴關鍵百歲終不枯道苟明於心如馬得堅車
養以歲月久自然登坦途江河失風浪草莽成膏腴
熟視八荒中何物能勝予時來與消息吾自有卷舒
死生亦大矣汝急吾自徐捷行不爲速曲行不爲迂
一漚寓大海此物定有無誰能具此眼況望將其鬚

學有不精盡遂至玉碓砭昔人中道立爲汝指一隅
千言不知要徒自費吹噓所以季路勇不如顏氏愚
請子罷百慮一念回須臾忽然遇事入此語當不誣

和趙承之

十月九日昏夢集職事向人如束濕看朱成碧有底
忙然箕煮豆相煎急長官抵几入門去小吏垂頭就
行立塵埃上下父可厭學問崢嶸老難入平生謬欲
師古人遇事始知吾不及正須眼底去涇渭便自曾
中無戟級丈夫蓋棺事則已破屋頽牆使誰葺要隨
歸鴈刺天飛莫待枯魚過河泣

曹州後園夜行

衣欲生稜夢不成城頭高下打三更月明如畫柳如
畫更向瑤池南岸行

風吹蒲葦叢三首

風吹蒲葦叢中有霜墮意美人天一涯行客作初夜至
風吹蒲葦叢秋色日向晚美人何時來行子飢未飯
行子惜日月美人輕別離風吹蒲葦叢及時當早歸

曹南試院懷向子諲兄弟兼呈張擴

大向金相玉爲表小向堅車取長道閉門不見今幾
日塵埃滿城何時好病夫坐穩百不聞讀書聒人到
夜分朝來雨過涼氣足思與張侯同叩門

試院中作二首

客夢斷復續角聲寒更長踈籬擁殘月老木犯新霜
閉繫身何恨馳驅汝自忙稍知詩有味復恐道相妨
諸生未下筆客子且安眠老覺文章退官憂簿領纏
短檠仍有味高枕自無緣但願無他苦今年如去年

擬古

西鄰有佳人開戶納明月月照衣上纓同心爲誰結
此結今幾時未解心已折隔林聞搗練起坐更嗚噎
情人在萬里我獨音問缺不聞行路難但見思婦切
年來契闊又烈士或喪節如何空床居初未見短闕
胡馬與越鳥本自無離別草搖新霜白秋送池水竭
君心有斷絕妾恨無盈歇

正月十五日試院中烹茶因閱漢碑

小爐方鼎蛙蚓鳴那知簾外東風驚亂雲初破盤鳳
影缺月半墮春江明已驅簿領出門去更澆肝肺令
愁醒大碑古字久寂寞高堂素壁空崢嶸坐看光焰
掃塵土便覺冰霰臨窻屏文章斷絕生氣在妙句直
欲無蘭亭嶧山野火燒欲盡瘞鶴半在江中陵不如
此書更竒古反覆厭厭無譏評山精地神肯愛護至
今歐虞來乞靈要令石鼓舉吉日不必細字臨黃庭
生平訪古少如意對此自足忘經營世間兒女爭媚
好紙上姓名誰重輕邇來半月得堅坐一室當行千
里程南樓燈火漫明滅北里笙竽頻送迎儒生事業

了不惡故人浮沈吾嬾聽更闌更自取書讀喚起奴
僕尋短檠

試院夜坐

急雨翻燈夜不眠小床欹側似乘船平生萬事不如
意病後一身私自憐海中神山渺茫裏方外酒徒焦
悴邊本自無心覓餘地問公何苦愛逃禪

清都行

我昔謁帝白玉墀獨駕翠虬驂赤螭御風而行過日
圍遂登清都游太微廣殿上建明月旗綴以列宿懸
雙蜺帝顧而嘆憐其癡寸田不治來何遲我拜稽首
心自疑世俗逼隘臣所知黜慢之故還無期後有美

人雲霧衣玉坐交映生光輝不必翠被緣珠璣祕文
玉簡手自持見我而笑揚蛾眉問我此去來何時握
手贈我藍田芝汝生甚良學則宜無自輕厭令神馳
一來人間今幾時恍如夢覺不可追骨肉腥穢顏怵
怵北風吹寒霜露微想視倒景凌空飛卻從帝居尋
五妃爲汝更賦無言詩

試院中呈工曹惠子澤教授張彥實

十日虛房罷送迎不知新鴈已南征忍窮有味知詩
進處事無心覺累輕殘葉入簾收薄暑破窻留月漏
微明知公坐穩無它念識我階前拄杖聲

寄知止

近有書來欲見尋扁舟南下已春深濁河遠貫長淮
水峽岸遙瞻寶塔臨揚子宦游常落拓茂倫心事轉
崎嶇雲橫雪擁藍關路總是平生願學心

印纍纍

印纍纍綬若若不如相逢一餉樂谷量牛馬斗量珠
不如閉門細讀平生書居閑意氣或有餘利害毫髮
過不能以手援其軀風吹月明落我庭樹宿鳥夜驚
徐又飛去晝夜有程汝何不住前畏彈射後畏網羅
孰視鴻鵠雲霄可摩亦如人生如意少不如意多富
貴欲長保執斧不見柯印纍纍如此宿鳥飛去何

曹南過五丈河隄入城訪顏岐夷仲清談久

之乃歸

春色不自惜落花如許愁晴天一望遠漕水十分流
每遶長隄去頻因好句留相隨覓季主不必貸河侯
論極文章祕居兼竹石幽和風落香燼晚日泛茶甌
壯節知無用諸儒誤見收江山亦在眼歲月忽忘憂
南郭今喪我長卿仍倦游謾成長韻律勝與小蠻謳
簿領憎頻過塵埃嬾再謀何須五湖口風雨轉船頭

雪夜

政和六年

曹州城南三日雪半夜疾風吹石裂先生睡美喚不
聞不信衾幃冷如鐵病妻索火少聲韻稚子哦詩應
歌節殘書向人老可愛舊劔空在磨先缺未能去尋

泉石伴未用深藏狐兔穴新正已過今幾日歲事嬾
復從人說長江略無千里夢故人動有十年別相逢
一笑又艱阻所向端坐成癡絕城中諸公不相棄時
有妙句扶衰拙頗知晴意在明日泥深不怕車輪折
便當脫帽過君家共放南窻看新月一杯凍酒君莫
辭預借炎天洗煩熱

曹南官舍書事

去歲頭已白今年眼復昏不憂窮至骨仍有病傷魂
酒薄如官冷年豐荷主恩空庭閑草木終未答乾坤

早出

早出公莫厭此心吾已灰嚴風送月落曉氣挾霜回

疾病衝寒怯衰遲畏事催忽忽節物去袞袞簿書來
破壁詩猶在荒城菊半摧還家一樽酒思與故人開

寄江端本子之晁冲之叔用

往歲孟秋月我行東出關人煙眇一作歸路風雨轉

河灣別恨交游失心成木石頑有隨妻子嘆無望鳥

烏閑曩事空回首微官真一作強顏舊語塵土送頻

辱簿書頌日月勤憂患庭闈實阻艱自忘身窘束時

得淚潏潏疾病衰猶活漂流老未還悞害文字癖虛

覺鬢質毛班苦語終難好一作燕辭漫不刪絕知

出意表敢復見顏間二子今懷璧羣公時賜環寄書

常恨草雕句得無慳晚照雲千疊新涼月半彎相忘

有道術那得厭塵寰聖治先三輔皇威極百蠻物能
同應瑞民自不藏茲薄技寧堪奏餘光或許攀何須
陽翟望咫尺是箕山一作相期下江海不敢厭荆蠻
遠樹出頭角諸峯明鬢髮與辭
肥馬健目就小船趁挂子猶堪拾梅
梢或許攀不須陽翟路咫尺是箕山

兩鶴行

西風引湖光上與月色亂化為兩白鶴飛來洞庭岸
洞庭無網羅兩鶴願為伴鳴聲既清好羽翼又璀璨
一鶴飛上天久厭俗眼玩一鶴不能飛摧頽自悲歎
三年望絕壁念汝腸已斷昔既薄恩情今還恨霄漢
未忍學鷦鷯裁求一枝換

陵城歌曹州城北十里有陵城坡冢纍然即

定陶恭王丁傳陵也余往來過之傷嗟再三
因爲作歌

北風吹沙秋草黃漢家故陵當路傍殘基斷壠趁風
雨狹徑小樹行牛羊當時王子朝未央飛燕姊弟承
龍光大策已定回朝陽不知外家諸舅忙後來變化
尤猖狂佞賢賊莽分行藏豈知漢運中更長濟陽舍
中方赤光終亦變化隨飛揚何獨此地令人傷人生
觀此當自顧位高金多終此路君不見五陵佳氣且
如此更復何情說丁傳

早至天寧寺即趙州受業院也

殘月曉未落踈星點寒林嚴車城南路先聞鐘磬音

道人迎我入共步重廊深淪瑤施淨供水味雜海沈
蒲團近宿火不受塵埃侵欲求半日息薄領勤相尋
東堂老禪師枯木尚龍吟一轉庭前栢諸方疑至今
我生晚聞道所向足崎嶇謬傳無字印嘗恐力不任
淮海罷行役吾人多滯淫於焉一枕夢可見平生心

曹南寄親舊

淨名居士默無語翰林子卿虛見尋半世泥塗催老
大中年詩律費光陰江湖每有同歸興酒角初無獨
飽心三尺枯桐取煨燼斷絃遺譜有知音

大雪不出寄陽翟寧陵

薄書終歲忙風雪一日靜閉門近殘火稍覺諸事勝

平生汗漫游已負麋鹿性微官不能歸但見日月競
老人去已遠我行復未定訓言實在耳無因問溫清
歸心止陽翟悲夢識新鄭大女癡無比有語多未聽
小女索乳啼不與窮屋稱想喚添丁來與汝相和應
低回坐兒曹氣血安得盛非無車馬心未忍求捷徑
顧自阻飢寒疇能免譏評諸郎何時逢想作玉樹映
文章有活法得與前古並默念智與成猶能愈吾病

與寧陵叔弟別後有懷兼寄趙才仲二首

一別又經月欲來渾未期寧知萬卷讀難療十年飢
長物新添女生涯舊有詩更傷新況味不報老親知
表弟今何在中郎亦漫游平生足艱阻今日倍遲留

誤辱瓊瑤報兼蒙札翰投南窓五更月常照別離愁

大雪不出

晶晶日欲出
飀飀風自橫
近階三尺雪
附火一杯羹
老樹春難到
深簷鳥或鳴
新春第三日
堅坐若爲情

自曹南至陽翟追懷江上舊游呈叔弟

醉別白沙江上亭
晚蟬高樹各秋聲
風乘小艇鳧鷖
進雨歷疎簷環珮鳴
家事不隨王事了
新愁常接舊
愁生只今疲病嫌
鞍馬十日同居眼暫明

自陽翟至寧陵與虛已叔諸弟別還曹未父

知止復來偶成二十八字

綠遍牆頭楊柳枝
小亭春盡阻歸期
頭昏目暗無情

緒不比少年離別時

試院中作

職事侵人畏作官
略偷身去不能還
樹移午影重簾
靜門閉春風十日閑
尚有文書遮病目
却無塵土犯
衰顏故人何處蓬籠底
看盡江南江北山

去冬試院中嘗作詩云
衣敝蟲可拾髮垢擲
不下披衣坐牆角
尚有微火跨平生
足拘窘
今日幸閑暇
新文加點竄
欲歇不能罷
雖微塵事妨頗畏
俗子罵出門見諸老
此語君可畫
今年復入試院職事多窘迫者
簿書滿前如赴蹈湯火也
再次前韻

誰令君作官衮衮簿書下誰令君不學陷穽乃欲跨
緬懷北憲翁斯人蓋多暇田疇望家遠日月已秋罷
尚蒙諸公憐未至官長罵何時歸來圖更作一段畫

乃欲跨
凌跨

兩後數與李仲輔兄弟往來且約十七日同

過士特因成長韻

鄰鷄再三鳴不改風雨晦東裝向前塗恐與泥潦會
故人時一來共此一室內微言久已絕苦語或未遂
子生甚竒古却立有餘地舊從伯氏游則已聞令季
斯文儻未遠吾今蓋憔悴相期無何鄉獲保清淨退
收身稠人中着眼世事外山空倚巖石雪立老杉檜

往來相遇難更自少如意旦日過城南把酒公一醉

首夏二首

生平寡嗜欲頗願得少閑盡讀未見書徧尋雲外山
往來二十年昔者盟未寒妻子見驅迫低頭言作官
朝翻朱墨案暮對藜藿盤豈無一畝宮今汝得少安
向來棲息地苔竹奉餘歡何時二三子共駕牛車還
汝實江海人悞令塵土干舊遊在彷彿欲往當不難
但去眼界窄自然心地寬

空庭下踈箔樂此樹蔭美鳥聲相續來百種皆可喜
日長少文字俗事不到耳開窓略須夜月露欣一洗
頗念閑居樂感歎投筆起吾家老清源

家姑先封
清源君

愛

我入骨髓還家治場圃喚我共料理會同江海去更
欲附船尾平生跨欵段不敢廢鞭箠誰云馬中龍一
日有萬里下鄰吾所知江晁老兄弟

入作深

東萊先生詩集卷第八

呂本中居仁

問晁伯宇疾二首

晁子卧京城，歲月晚不用。偷身出塵土，閉戶忍疾痛。
客來不與語，有口吾懶動。今年又請老，氣力當少縱。
生平厭筆墨，棄去不復弄。頗念白頭親，甘旨須子奉。
呻吟在枉席，妙語時一諷。誰令稻粱謀，未答泉石夢。
鄙夫託末契，義實憂患共。天定或勝人，寡固不敵衆。
請公但縮手，保此清淨供。因書報安否，兼與問群從。
取驥伏鹽車，更欲繫其足。於物未有害，罰汝則已酷。
晁子江海士，老去自窘束。平生萬卷書，豈止十年讀。
隨身幾箱篋，一一手自錄。初無解衣贈，未免操戈逐。

仲也抱瑚璉幼亦好奇服西堂老弘微與子同軌躅
過門有江謝共語喧破屋棄官吾已懶覆種子未孰
逢人強應接遇事多詬辱何時把鋤頭得止季路宿
商村河決

新霜行

新霜下幽蘭昔在顧眄間時過理當爾敢復致一言
物生無榮賤悉是君所見相值有相違誰能滿吾願
田園棄荒蕪官居走郵傳誤尋文字盟秣馬當百戰

一飯或未飽逢人足嫌怨窮於投林猿窘若巢幕燕
忍學少年子羽翼偷綯練百萬買纏頭千金奉娛宴
願爲匣中玉不作秋後扇丈夫重許與正爾未爲倦
絕糧有不死酒肉虛健羨古人馬伏波吾猶識君面
將去曹南連得江晁書因歎存歿諸友遂成

長韻

西風脫殘暑我病不自聊吏舍少還往亦復長蓬蒿
欣然脫帽去念此非一朝陽翟未遽往寧陵虛見招
初無食息地未免柴水勞故人數通書尚有江與晁
窮涂感節義俗耳受風騷向來相知人昔盛今寂寥
落日送汪謝荒山留老饒關侯最傑立亦以膏自燒

後生有向子更盡兒女嬌出門天奪之不令上雲霄
坐看朋友淚未減春秋褒怪我但羸疾悞蒙風雨搖
日月費奔走文章勤琢雕會須領妻子更欲投吾曹
耆舊曾愛歸隱諸公憐久要劉文器之及顏平仲向伯恭韓秉則諸人皆相約爲
一州之隱以便出同赴雞黍歸但守簞瓢相將訪雲
往還講習之益山所至雜漁樵還當古渡口卧聽西江潮

精衛詩

西山有鳥其狀如烏名曰精衛其名自呼精衛堙海
不堙不止問誰之報云帝之子帝子女娃往遊不還
精衛求之不敢有安海流不改汝堙不遷嗟哉精衛
志則可憐我昔讀書惟聖之求竭力從之以春及秋

老人宴居審吾之學惟時友朋日就雕琢聖言甚微
吾意則近近以識微退或有進三年于曹惟罪之恐
人雖甚厭子亦不勇舒舒其雲沄沄其水子不與歸
而日有以豕羊在牢芻秣之戀其庖及之抑又誰怨
子學日遠子道日踈有愧精衛其誰與居精衛之飛
不必戾天子之不如寧有智焉惟作與否愚智之擇
小人作詩惟一勸百

寧陵弟相送至南京因成四韻寄季一子之

叔用

白髮無端巧上頭鏡中顏狀不能羞要尋楊子一塵
地未用劉公百尺樓野竹連陰護苔蘚暮雲生雨續

黃流秋風有信鱸魚在更約江晁共小舟

十一月一日步河堤上

簿書糾纏人欲出不自許老吏環我前更作附耳語
脫身上河堤頗似晝伏鼠河堤平如掌下有千歲土
夕陽歛殘照草木過寒雨遊魚著鈎餌舟子快新煮
煮魚得放飯尚嘆行役苦江湖平生心歲月可逆數
故人書斷絕吾事有去取歸來討清尊妙句還一吐

留侯

留侯下邳時豪氣或未除晚節欲輕舉效在黃石書
其書本無言一嘆三嗚呼彼公實天人識此鸞鳳雛
良田有蕪穢令子痛自鋤萬事不得已一身常晏如

袖手默無語四方瞻步趨不知隆準公果能知子無
 小兒荀彧輩下及崔浩徒謂能明子心此語亦已誣
 不能處其知正足殺其軀所恨生已晚聖門無坦塗
 學不盡其才未免風俗驅詩書在煨燼子何不回車
 試問禮之本更觀心地初莊生言欲當則緣於不得已不得已之類聖人之道
留侯蓋庶幾於此韓非曰非知之難處知為難矣此留侯與荀彧輩所以分也使其親受業於聖人蓋未可量故妄作此詩論其大槩實平昔所粗曉也

送韓撫秉則赴棣倅

公如玉壺冰見即離煩熱况當清秋懸更自貯霜月
 中邊本無垢何處覓焚蕪盛以百鍊銅此亦不得折
 初蒙一日款遽有千里別扁舟轉青齊歲事當雨雪

遠行不羸糧已悟服食訣古來饕餮徒頗謂一世傑
唾壺彼何知便爲如意缺觀其所用心舉不異鼠竊
首陽獨往人渠自飽薇蕨舉頭公一笑百慮無以絕
江源初濫觴未乃流不竭傷哉韝上鷹一飽便飛掣

讀秦碑

秦人跨九州欲以傳萬世立石名山旁往往章

一作示

得意至今見遺刻字體甚雄異壯哉蒼蘚文未改回

屈勢風雨所侵蝕中有千丈氣嚴如虬龍蟠深若鐵

石利餘威到山鬼謹守敢失墜漢魏能書人亦豈可

睥睨未能識藩籬何止趁姿媚初無一日雅但有三

舍避文章又竒古遷雄蓋苗裔觀其所稱

一作著

述肯

爲尊者諱巧言未大失末乃爲俗累嗚呼結繩前此
又誰與記君臣俱無爲垂拱天下治春秋紀日月大
易垂彖繫嬴氏厭休息動以衡石計斯翁變古文程
邈分篆隸自此更滋蔓日以趨簡易馳驅千百年漫
有紙墨費誰能罷煩文盡掃者天外此書雖見存或
以少爲貴持此槁木枝我亦無甚愧

次韻答曹州同官兼簡范寒信中

好詩有味終難捨俗事無功莫羨渠破曆屢翻深甕
酒短檠時檢舊窻書何年雞黍先投社是處田園可
結廬更請二公搜好句一身苛癢要爬梳

龔彥承觀軒

愛山不能歸常恐山怪責終歲在行役感動頭已白
高秋強僮僕路過龔掾宅蒙君開南軒除我眼界窄
白波遶青嶂彷彿見顏色江上飛來峰卻立對君側
蕭蕭蒲葦叢不受塵土隔知君有竒趣笑我常偏仄
人生無窮已得一乃願百床頭貯美酒窻下著好客
請公但默然歲晚當有獲

畫馬圖

平沙遠草春未生萬馬夜起爭悲鳴秋雲欲墜一作
都護壘急雪暗下屯田管胡人却走畏深入漢家飛
將已雲集此時一馬直一作萬錢隴右河湟更供給
邊塵淨盡今百年萬馬潦倒西風前天生駿骨例難

阻是處雕鞍蒙愛憐君家九幅開新帳歛見驪裏華
堂上長鞭不用羈絡遠霧縠雲羅倚惆悵高旌嫋嫋
霜露微苜蓿得雨連山肥同時戰士今不歸曹霸弟
子能神奇毫端妙處君得之驚駘往來空爾爲

堤上

落花吹盡不堪憂只見河堤水漫流晚日強穿城北
市春風猶駐驛南樓妻孥轉覺爲身累歲月終難忘
汝留萬里長江一尊酒故人何處倚扁舟

將赴海陵出京沿汴覓舟候送客不至遂行
子行殊未來我馬已再秣略投故人飯苦厭從者聒
長河見舟楫尚恐塵事奪風翻蟬急噪雨漱岸欲脫

南山已在眼想望淮水闊別離古所重況在交友末
翩然欲行際所寄一短褐路長書來稀何以慰飢渴

四月二十二日出城至子我家候子之民師不至因簡南文壯興夷行伯野季一由中諸公

京師新鄭與諸晁兄弟往還前後數詩

夜雨不嫌久凜然天欲秋客燈吹婁滅細雨落還休
未許金張並虛為鄆杜遊江湖少歸夢知為故人留
我髮白已短公愁安得長牆根春薺老瓶水臘梅香
侍立無天女相隨有漫郎平生湖海興今夜宿連牀
髮短各已白眼昏誰復明殘春斷花柳晚日閉柴荆
潦倒書常廢驅馳夢或驚尚於團聚樂雖老未忘情
令弟窮顏蠟書生老仲舒相招得共處何往更安居

歲月塵埃外桑麻雨露餘送行無別物圯上一編書
苦語相留極虛床會宿頻山東今出相海內不無人
婦女能尊客兒童不厭貧長途有如遇今日倍情親
本中將爲海陵之行念當復與子之作別意
殊憤憤偶得兩詩上呈并告送與壯輿叔用也
斯人如玉雪可愛不可忘助以濯滄海亦復閱餘光
今茲困塵土更伴衆翼翔時來喚我語共此一榻涼
風雨下頰舌冰霜清肺腸我老漸窘束公才方頡頏
春秋有體製子蓋能文章要當纂微言不以近故妨
粲然東園花不登葵藿場

老僕倦日長羸馬困道遠東行數日間尚欲一再款

我能喻子意子亦識我嬾追懷十年遊僅得一笑筦
時能煮湯餅更復下茗盃晁郎本京邑劉子蓋楚產
江山兩秀異與子曰在眼南風動歸興感慨毛髮短
相尋儻有日歲月亦未晚

鴈

鴈從何方來云自燕趙北今當何所往暖日近暘谷
寒雲墮江漢未見所棲宿朝憂稻梁少莫畏罟網逐
惜哉還往頻愈覺歲月促悔不近藩籬隨群伴雞鶩
羽幹何必好志願亦易足物生有高下終恐厭摧伏
公看滄海頭萬里飛鴻鵠

赴海陵行次寶應

一作過
白田

半升濁酒試尊羹，賤買魚鰕已厭烹。
淺水依蒲有船過，淡煙籠月更人行。
交遊潦倒腸先斷，疾病侵陵涕自橫。
北望中原一作幾千里，故人誰復喚歸耕。

海陵雜興八首

四海今誰託，飄然未有歸。
先生作詩瘦，稚子食言肥。
未忍螢枯死，甘隨鷁退飛。
故人取堅坐，不爲賦無衣。
相見各已老，壯懷如昔然。
蛟龍夜改穴，風雨暗移船。
把酒猶堪醉，逢人嬾問禪。
還家有餘地，留我買山錢。
諸老今無恙，秋來數寄聲。
尚能無事飲，猶勝不平鳴。
行李虛長鋏，生涯共短檠。
江湖日在眼，恐負白鷗鳴。
荒城足風雨，今日更新冬。
草木山嵐暗，人家水影重。

漫看文字過時有簿書逢目極橫塘路西樓聞暮鍾
曾子不復見斯人絕可憐夢回千嶂裏氣奪萬夫前
異日文章社平生香火緣高樓更南望霜露一作倚

江天

時曾元以
新物故

萬事不如意自然添白鬚極知少餘韻何敢厭窮途
土俗尊魚婢生涯欠木奴東行見李白誰爲致區區
空山鶴夜鳴海風令人驚對月且愁思看書終眼明
斗酒不爲薄客帆那計程猶憐它夜雨曾作打窻聲
輕帆載曉月和夢到一作別揚州木落山光寺江橫北
固樓漫拋三徑隱虛有十年遊尚勝劉師命才因越

女留

往來送迎城南道中二絕

破裘重補却勝寒
暗減頭圍覺帽寬
數頃桑麻遶城路
每隨妓吏去迎官

海氣如煙跨市樓
北風連夜舞

一作雨

梧楸平生事業

難牽強坐守寒燈聽聒囚

家叔舍弟與黎介然會于符離因用兩絕奉寄

漫約同歸久未償
只今留滯各它鄉
春風有信勤歸鴈
夜雨何時復對床

老覺爲官百不宜
故人雖在鬢如絲
遙知再踏同遊地
更想汪饒曳杖時

余昔與介然德操
信民同寓符離

病中夜聞雪作時
堯明有廣陵之行未歸思

爲數語奉寄父之未就它日堯明歸携詩相
過飄然有馭風凌雲之氣因以前詩答之

公方它山行我此一室病擁爐聽夜雪若與風勢競
蕭條中疑休狼籍父未定平明望屋瓦入我眼界靜
所恨子猷遠無復肯乘興想當巖壑間玉立與輝映
時來有傑句遂入風雅正寒威固深避草木自溫清
公家鶴氅翁韻與羲皇並流風及遠孫筆力如此勁
彫績或過眼惟我乃弗稱新春上河堤梅柳當歷聘
過從不厭數荒疇取微徑

次韻堯明貢院詩

忍窮不能歸強飯亦良計東風頻報春草木可次第

厭為龍頭縮寧作龜尾曳從來翰墨場一作文即作

乃有聞見滯譬如已耕一作田更欲深種藟或蒙鹵

莽報未肯忍一作即弃置不聞太倉粟亦肯一作校豪髮

細王卿固倦遊穢濁有乃一作蟬蛻聲名動時人流一作

我實託末契泥塗倒屣齒塵埃滿一作衣袂要為無

用用乃作不事事下馬重一作舊戰場午日在庭祀一作

砌向來槁木枝忽有紅綠綴來非偶然往去一作亦

無所詣聚蚊著甌中得忍一作聽此鶴唳窓前一作有

餘馥勝韻入松桂扁舟下淮南閭里思少憇熟觀昔

所歷請與居士戲江湖要同歸不假木蘭柁變一作萬

戲滄浪要同歸
更整定日柁

海陵夜作

夜長夜長天復霜海陵城中今夜長夜長夜長冬向

晚一作天寒堦無人看月滿一作海陵城路長一作

家遠來舊稀水闊山深歸夢短一作堂上書生頭已

白胡老健兒十年客想渠當此夜長時撫劍雖長酒

杯窄明妃愛惜漢宮衣烏孫公主終不歸戚姬去視

鴻鵠舉更為君王作楚舞當此夜長誰送迎此月遠

一作明夜長夜短公莫厭寒即重裘此月遠

莫憂多憂多厭公白頭

東萊先生詩集卷第八

文化已已